



• EDITORIAL • RÂL VÊNGTU • CHHÛNGKAW CHANCHIN

» FG&CC thawktuten intuaitharna hun hmang

» Synod Revival Meet Vawi 7-na

» Synod Hospital-a thisen pèk chungchâng

RNI 68092/83 Regn. No. N.E. 1024

From

Synod Literature & Publication Board

Synod Office, Aizawl - 796 001

Mizoram. Phone: 0389-2324590

SYNOD *Newsletter*

Volume XXXIII

No. 7

E-mail: synodnews@gmail.com

JULY, 2018

LÂWRKHAWM

BOOKROOM BRANCH THAR

June 12, 2018 khân Synod Moderator Rev. F. Lalrinnunga'n Synod Bookroom Vaivakâwn Branch thar a hawng. Branch thar hawn ni bik atân hian Bookroom lehkhahu leh bungruate 10%-50% discount-in zawrh nghâl a ni. He Branch thar hawn hi Aizawl West I Presbytery Inkhâwmpui thurêl bawh zuia PRESCOM Board-in Aizawl Area huam chhûnga Synod Bookroom Branch thar hawn tûra a rêl a ni a. Synod Bookroom Vaivakâwn Branch thar hi Vaivakâwn Kohhran Gospel Centenary Hall hnuai, kawngpui âna awm a ni.

B.D. LEH B. MISS. RESULT A CHHUAK

Senate of Serampore College hnuai Bachelor of Divinity (B.D) leh Bachelor of Missiology (B. Miss.) result chu June 22, 2018 khân a chhuak a. Aizawl Theological College aţanga BD exam bei 20 an awm a, an grade chu hetiang hi a ni: A- 3, B+ 12, B 4. Zirlai pakhat chu eng emaw avânga result chhuak rih lo a awm.

Senate of Serampore College hnuai B. Miss. zirna awm chhun Missionary Training College (MTC), Mission Vêngthlang aţanga exam zawng zawngin an pass vek a. An grade chu hetiang hi a ni: B+ 8, B 3, B- 2.

June 13, 2018 (Nilaini) khân ATC zirlaite Academic Session 2018-2019 ţan tûrin an lût khâwm leh tawh a. June 18, 2018 (Thawţanni) aţang khân Class neih nghâl a ni. Zirlai awm dân chu hetiang hi a ni: B.D I - 26; M.Th. I - 28; D.Th. I - 2; DCPC- 3; B.D II - 29; M.Th. II - 34; D.Th. II - 2; B.D III - 27; D.Th III - 2; B.D IV - 27
Total - B.D -109; M.Th - 62; D.Th - 6; DCPC - 3

Hmeichhia: 41, Mipa : 139, A vaiin : 180.

SYNOD PRESS MANAGER THAR

Upa Lalthanpara, Synod Press-a Estimator thawk lai chu Prescom Board Executive Committee-in Manager-ah a kaisantîr a, June 8, 2018 khân he hna hi a zawm.

KOHRAN INPUMKHATNA LEH THAWH HONA SEMINAR BUATSAIH A NI

* *Aizawl District huam chhûnga mite pual seminar hmun thumah mi 652 an kal*

* *District danga kohhrante puala Seminar buatsaih zêl tum a ni*

Kum 2015 Synod Inkhâwmpui Kohhran inpumkhatna leh thawh ho chungchâng thu a rêl, Synod Executive Committee-in a bawh zuina kal zêlah July 6, 2018 (Zirtâwpni) nilêng khân Aizawl district chhûnga kohhrante pualin 'Kohhran Inpumkhatna Inzirtîrna' tih thu zir hona (Seminar) buatsaih a ni a, he Seminar hi a rualin hmun thumah buatsaih niin mi 652 an kal thei.

Kum 2015 Synod Inkhâwmpuia thu ngaihtuah tûr, Presbytery aţanga lût zingah Aizawl Bethel Presbytery aţanga lût, "Mizoram Kohhran hrang hrangte inpumkhatna leh thawh hona ţha kan neih neih theih nân Synod-in Council siam nân hma la rawh se," tih te; Aizawl East Presbytery aţanga lût, "Mizorama Kohhrante inpumkhatna atân Synod hian chak zâwkin hma la rawh se," tih te leh Champhai South Presbytery aţanga lût, "Kohhran hrang hrang kan inpumkhat theih nân Synod-in hma la rawh se," tihte chu hlâwm khatah lain ngaihtuah a ni a. A theh lûtta Presbytery-ten an sawi fiah theuh hnuah palaiten sawi zuiin, "Mizorama Kohhrante inpumkhatna kawng zawn chu ţha kan ti a. SEC-in kawng lo zawng rawh se kan ti," tiin thutlûkna siam a ni (Synod 2015 Gen.1).

Synod Executive Committee (SEC) chuan Synod-in mawhpurhna a pèk chu bawh zuiin a ţul anga hma la tûrin Synod Officers' Meeting (OM) a ruat a. OM chuan zir ho tûr a bua siam ţhaa hriain ziak tûrin Rev. Dr. H. Vânlalauva a ruat a. A ziah zawhah en dika zût mâm tûr mi pali ruat lehin annin an zût mâm zawhah, 'KOHRAN INPUMKHATNA INZIRTÎRNA' tih lehkhahu tê, phek 46-a chhah tihchhuah a ni a. He lehkhahu chhûngah hian thupui hlâwm li - 'Mizoram kohhran lo din ţan thu leh kohhran pâwl hrang hrangte inlaichin dân' tih te, 'Kohhran inpumkhatna leh thawh hona kawng harsatna leh a nghawngte,' tih te, 'Kohhran inpumkhatna leh thawh ho ţulna leh pawimawhna,' tih te leh 'Inpumkhatna leh thawh hona atâna hma lâk dân tûrte,' tiin then a ni a. Hlâwm hnih ve vein chawhma leh chawhna zir tûra then a ni.

Seminar thawh khatna, Aizawl district huam chhûnga buatsaih dân leh kal dân chu hetiang hi a ni:

Zone I: Mission Vêng Kohhran Hall-ah Synod Secretary Upa R. Dêngzîkpuian a hruai a, Rev. H. Remthanga, Finance Officer-in paper a chhiar. Aizawl khawpui chhûng Presbytery pathum - Aizawl Chhim, Aizawl Chhimthlang leh Aizawl East huam chhûng leh Aizawl pâwna Pastor Bial pakua - Muallungthu, Aibawk, Sumsuih, Sialsûk, Sateék, Sairâng, Sairâng Dinthar, Lêngpui leh Thingsûlthliah huam chhûnga kohhran tin aiaw pahnih zêl leh Pastor/Minister zawng zawng leh Pro Pastor-te tel tûra beisei an ni a, mi 221 an kal thei.

Zone II: Zârkawt Kohhran Hall-ah Synod Statistician Rev. R. Lalnuntluangan a hruai a, Rev. Dr. H. Vânlalauva, a thu ziaaktuin paper a chhiar a, Synod Puipa zinga mi Rev. R. Vânlalngâka, Synod Secretary (Jr.) in a uap bawh. Aizawl khawpui chhûng Presbytery pathum - Aizawl Central, Aizawl West I leh Aizawl West II huam chhûng leh Aizawl pâwna Pastor Bial pakua - Tlungvêl, Tlungvêl Vêngthar, Sesawng, Saitual, Keifâng, Mualphêng, Sihfa, Zohmun leh Sakawrdai huam chhûnga kohhran tin aiaw pahnih zêl leh Pastor/Minister zawng zawng leh Pro Pastor-te tel tûra beisei an ni a, mi 203 an kal thei.

Zone III: Bâwngkâwn Kohhran Hall-ah Synod Finance Officer Rev. P.C. Pachhûngan a hruai a, Rev. Dr. H. Lalrinthanga, ATC-a Associate Professor-in paper a chhiar a, Synod Puipa zinga mi Rev. B. Sângthanga, Synod Executive Secretary i/c Mission, etc-in a uap bawh. Aizawl khawpui chhûng Presbytery pathum - Aizawl Bethel, Aizawl Hmar leh Aizawl Hmârchhak huam chhûng leh Aizawl pâwna Pastor Bial pakua - Ratu, Dârlâwn, Dârlâwn Vêngthar, Suangpuilâwn, Phuaibuang, Phüllên, Phüllên Vêngthar, Khawruhlian leh

SYNOD Newsletter

EDITORIAL STAFF

Rev. Dr. C. Chawngmingliana
Rev. PC Pachhûnga
Upa H. Ronghâka
Rev. R. Laldinthara

Editorial

INPUMKATNA TÛRA PAWIMAWH

Mizoram Presbyterian Kohhran chuan Synod Inkhâwmpui thurêl bawh zuiin tûn hnaiâh kohhran inpumkhatna chungchâng zirhona a buatsaih a. Lal Isuan amah ringtute chu inpumkhat tûrin a duh a, Pa Pathian hnêna a ãwngt ai pawhin amah ringtute chu pumkhat an nih theih nâna hum tûrin ngênngawl takin a dîl tih kan hmu (Jn 17:11ff). Kohhran inpumkhatna kawng zawn hi kohhran hotu leh lû ber duh zâwng a ni tih chu Kristian zîngah pawm lo kan awm lo hial âwm e. Chuti chung chuan hmun tam takah inpumkhat a hnêkin kan la inñhen darh zâwk zêl a, mihring chak lohna (mahni hmasialna) chu sualin hmanraw ãngkai takah a hmang ãhin a ni.

Inpumkhat tûra kohhran malin hma a lâk hi thil ãha leh ãngkai tak ni mah se, kohhran dangten tûl an tih ve a pawimawh a, Lal Isua duh zâwng a nih avânga tuang purh zêl tûra ngai theih a nih lai hian Setana huat zâwng leh hlauh ber a nih tlat avângin harsatna tam tak pal tlang tûr leh hneh tûr a awm. Inpumkhatna kawnga pawimawh chu mahni tih dân leh pawm dân aia Lal Isua leh a duh dân tipuitling tûra inhlan a ni phawt a, chumia innghat zêlin kan inan lohna lam aia kan inanna apiang chawi lâk zêl a ngai bawh ang. Hei hi kohhran pâwl hrang hrangten kan tih theih phawt chuan eng inpumkhatna emaw tal chu a thlen theih a rinawm. Eng pawh ni se, Mizorama kohhran lian berin ram pum huapa inpumkhatna thu zirhona a buatsaih hi a lâwmawm a, kohhran mite rilru a inpeih phawt mai hi a pawimawh êm êm a ni.

Phêk 1-na zawm...

East Phailêng huam chhûnga kohhran tin aiawh pahnih zêl leh Pastor/Minister zawng zawng leh Pro Pastor-te tel tûra beisei an ni a, mi 228 an kal thei.

Paper chhiartuten an chhiar zawhah sawi hona hun hman hman zui a ni a, sawi duh an tam a, sawi hona hi kham lo taka hman a ni. Zone tinah hian sawi hona sawite lo chhinchhiahtu (Recording Secretary) pahnih zêl ruat an ni a. An lo chhinchhiahte chu Synod Secretary hnênah pe khâwmin OM-in a la thlir leh ang. Hetiang Seminar hi District dangah pawh la buatsaih zêl tûr a ni dâwn a, a hun tûr chu OM-in a la ruat leh ang.

Zone tinah hian Presbytery 3 aiawh leh Pastor Bial 9 ațangin Kohhran aiawh mi 2 theuh kal tûra sâwm an ni a, Zone tin huam chhûnga Bialtu Pastor, Pro. Pastor leh Minister-te an kal bawh. Zone 1-ah hian khawpui chhûng ațangin Kohhran aiawh mi 133 leh khawpui pâwn ațangin mi 88, an vaiin mi 221 an kal thei a, Zone 2-ah hian khawpui chhûng ațangin Kohhran aiawh mi 107 leh khawpui pâwn ațangin mi 96, an vaiin mi 203 an kal a, Zone 3-ah hian khawpui chhûng ațangin Kohhran aiawh mi 142 leh khawpui pâwn ațangin mi 86, an vaiin mi 228 an tel thei a ni.

FG&CC THAWKTUTEN INTUATHARNA HUN HMANG

FG&CC Committee-in a rêl angin, hmun hrang hranga Family Guidance & Counselling Centre-a thawktute chuan July 2-3, 2018 khân FG&CC Main Centre, Mission Vêngah intuaitharna hun an hmang.

July 2, 2018 (Thawhtanni) nilêngin Counsellor-te pualin Counselling chungchâng thu pawimawh chi hrang hrang zirho a ni a, NI. Lalropuii, Mission Vêng, Counselling Psychologist chu Resource Person atân hman a ni. Ani hian Case Study leh Practical Base Study a zir pui a ni.

July 3, 2018 (Thawhlejni) nilêngin FG&CC hnuaiâ thawktute zawng zawng pualin Intuaitharna neih zui ngâl a ni a, he hun hi Session thuma thenin Session khatnaah Rev. P.C Pachhûnga, E/S i/c FG&CC-in thawktute fuihin thu pawimawh tak tak a sawi a. Director Rev. Lalsangbera'n Devotional Message a sawi

bawh a, ãwngtâi rualna hun hman a ni.

Session hnihnaah Upa H. Lalchhandama, O/A in office kalhmang leh hriat tûr chi hrang hrang a sawi a, Counsellor ten Branch hrang hranga an dinhmun leh an ngai pawimawhte an sawi bawh.

Session thumnaah Counsellor puala hun hmang lehin, Upa R. Lalmalsâwma, FG&CC Committee Member chuan, **“Counsellor-te pâwn lam ațanga an beisei dân”** tih thupui sawiin, Counsellor-te chu mamawhtute pan theiha awm reng tûr leh thurûk vawng him zêl tûrin a chah bawh.

Synod hian tûnah hian Counselling Centre 7 - Mission Vêng, Bâwngkâwn, Vaivakâwn, Champai, Sêrchhîp, Kolasib leh Lunglei-ah a nei tawh a. Hêngah hian thawktu mi 16 an awm mêk a. SEC-in a rêl angin kum 2019 hian Mamit-ah Centre hi hawn belh tum a ni bawh.

SYNOD REVIVAL MEET VAWI 7-NA

Synod Revival Committee buatsaih, ‘Synod Revival Meet’ vawi 7-na chu June 22-24, 2018 khân Bâwngkâwn Kohhran Biak Inah hman a ni a, Meet thupui chu ‘*Sim rawh u,*’ (Mt 4:17) tih a ni. He Meet-ah hian Synod Revival Speaker-a hman lai mi 70 leh an Team member 600 dâwn lai an kal thei a; thil danglam deuh kum danga la awm ngai lo chu Manipur Area-a Vaiphei Kohhran Revival Speaker leh Team member 11-te Revival Meet chhima an lo kal chu a ni. Meet-ah hian inkhâwm an ãha thei hle a, zai leh lam boruak a nuam hle.

Synod Sr.Executive Secretary i/c Revival Rev. Lalramliana Pachauvin Meet ãn zânah thu a sawi a, a khâr

zânah Synod Moderator Rev. F. Lalrinnungan thu a sawi thung. Synod Revival Director Rev. K. Rolungmuana te, Synod Revival Speaker ni mêk leh ni tawh, hêng – T. Upa C. Lalthantluanga, T. Upa Zârzoliana, Upa H. Zoliana te leh Rev. Vânlalbêla te hian vawi khat theuh Meet thupui an sawi bawh. Inkhâwm apiangin Zai-pâwl pathum an zai ziah a, an zai a nung ãhin hle. A dawngtu Bâwngkâwn Kohhran hi ei leh in leh mikhual thlen thuahte an bengvâr hle. Meet tâwp zân hian Aizawl dai vêla teihawi ãhînte hnêna Pathian thu hrih leh ãwngtâisak (Operation Nehemia) kalpui zui a ni a. Meet hlawhtling tak hman a ni.

Râl Vêngtu

Râl Vêngtu hnênah chuan nula tlangvâl an lo lêng lût a, an titi nak nak a. A inlêngte chuan, "Râl Vêngtu, Fifa World Cup 2018 hi i en ve ngai em?" tiin an zâwt a. Râl Vêngtu chuan, "En ve ngai tho ve," a ti a. A inlêngte chuan, "Chutia i en ve thin chuan i lo hmuh ve dân min han hrih la maw le," an ti a. Râl Vêngtu chuan World Cup a en ve ațanga a thil hmuh dân hetiang hian a sawi ta a:

1. Khua leh tui nihna rilru an nei lian hle: Player-hote hian khua leh tui nihna rilru an pu lian hle, an ram tân an khêl tak meuh meuh. Kristiante pawh hi vân khua leh tui kan ni. Heti khawpa Football Player-te mahin khua leh tui nihnaah an chiana, theih tâwp chhuaha, thih tha tak meuhva an ram tân an beih theih chuan keini vân khua-leh-tui nihna changtute hian *vân khua-leh-tui* kan nihnaah chiang thar lehin, Pathian ram tân hian lu chhum bân chhum huamin kan țang ve tûr a ni.

2. Thawh hona (Team work) a ni: Player-te hian an thiltih hi team work a ni tih an hre chiang thlâwt mai. Player tin hian tih tûr bik an nei țheuh va, an tih tûr bik chu țhahnemngai takin theih tâwpa hlenchhuah an tum vek mai. An inthlâwp țha êm em bawk. Hei hi team work tha zia a ni. Kohhrana Pathian rawng kan bawlna pawh hi team work a ni tih hre thar leh ang u.

3. Goal thun an tum rân: Player-te hian khêlmualah hlimhlawp atân mai an infiam lo, Goal khung an tum rân a, khelhpuite aia chak zâwk niha, hnehna *No mawi* (Cup) dawm an tum rân. Ringtu tam tak chuan kan khingpui hneh tumna tak tak pawh nei lovin leh thlarau lam khawvêla lăwmman dawn tumna tak tak pawh nei lovin mahni duh dân dânin hlimhlawp kan bawl kual mai mai thîn. Hei hi chu Kristiante nihphung tûr zia a ni lo. Lăwmman Lallukhum chhe thei lo hmu ngei tûrin engkimah insûmin intihsiaknaah bei țâlha țâlha chhel taka tlan zêl tûr kan ni.

4. Inkaihhruaina dân mumal tak an nei: Referee thiam tak te, Yellow Card, leh Red Card te hian inkaihhruaina dân fel tak a entîr. Dân bawhchhetu chuan a phû tawk hremna a tuar thîn. Player-in Dân a bawhchhiat emaw mawi lo taka a chêt emaw chuan *hetiana i tih leh vaih chuan* tihna ni âwm takin referee chuan **Yellow Card** a han pe a, chu vaukhâna chu a pawisak loh cheu chuan **Red Card**-in an han **knock out** ta a. Chu mai a ni lo, chêng tam tak an la chawi zui a, mipui ngaihah an hniam sawt bawk thîn. Chutianga hrem nih chu a hlauhawmin a hmingchhiatthlâk êm êm a ni. Keini pawh Lalpa hnung kan zuinaah hian a Dân kan pawisak lohva kan bawhchhiat chuan Yellow Card leh Red Card min pe hnial hauh lo. Ephesi khua a Kohhrano hnênah Lalpa'n Yellow Card pe-in Red Card pêkah a vau thu heti hian kan hmu, "I sim loh zawngin i khâwnvâr dahna kha a hmun ata ka sawn ang." Mî tin kan thiltih ang phû tawk zêla Yellow Card leh Red Card min pêk hi kan Lalpa hian a pawiti dawn hauh lo a nia aw!! Kan inchnîr leh hauh tawh lohna tûrin mawi takin i nung tlat ang u.

SYNOD HOSPITAL, DURTLÂNG APRIL, 2018 CHHÛNGA THILPÊK DAWNTE

I. CHARITY FUND

1. Ramthar Commitee, Kâwnpui Dinthar Kohhran	Rs 5,000/-
2. Durtlâng Kohhran Hmeichhia	Rs 10,000/-
3. Zotlâng Kohhran Pavalai Pâwl	Rs 4,000/-
4. Pûkzing Bial Kohhran Hmeichhia	Rs 2,000/-
5. Pu Rosâwmliana Vârtê, Leitan	Rs 1,000/-
6. Zothankhûma, Zârkawt, Aizâwl Sangau Bial	Rs 3,500/-
7. Sangu Bial	Rs 5,000/-
8. ENF, Mizoram Headquarters, Aizâwl	Rs 11,440/-
9. Mamit Kohhran	Rs 20,000/-
10. Khatla Bial Kohhran Hmeichhia	Rs 50,000/-
11. Lalthanmawii te chhângkua, Kolasib	Rs 1,000/-
12. Pu Laisanglûra, Durtlâng Mêl - 5	Rs 1,000/-
13. Pu Lalramena Râltê, Durtlâng Kâwn Vêng	Rs 1,000/-
14. Assam Rifle Kohhran, Dawrpui Bial	Rs 5,000/-
15. Pu J.N. Thangkima, Chanmari III, Lunglei - An fapa Vânlalhruaia Chinzah (L) hriatreg nân	Rs 3,000/-
16. Zemabâwk Kohhran Hmeichhia	Rs 10,000/-
17. Zemabâwk Bial Kohhran Hmeichhia	Rs 20,000/-
18. C. Liansângpua, Chawnpui Vêng, Aizâwl	Rs 3,500/-
19. KTP, Hnahlan Bial	Rs 5,000/-
20. Ramthanmawia, Hmunpui	Rs 500/-
21. Hliappui Bial Kohhran Hmeichhia	Rs 5,000/-
22. Republic Vêng Bial Kohhran Hmeichhia	Rs 30,000/-
23. Tuirial Airfield Vêngthar Bial Kohhran Hmeichhia	Rs 18,120/-
24. Khawlian Kohhran	Rs 2,000/-

II. THISEN PETE

1. KTP, Tuikual 'S' Branch, Aizâwl	22 Units
2. KTP, Bâktâwng Bial	31 Units
3. KTP, Siphir Vêngthar Bial	33 Units
4. KTP, Zemabâwk 'N' Bial	53 Units
5. KTP, Sesawng Bial	21 Units
6. KTP, Ramthar Tlâng Vêng Branch, Aizâwl	31 Units
7. KTP, Tuirial Airfield Vêngthar Bial	21 Units
8. KTP, Chawnpui Vêng Branch, Aizâwl	39 Units

PEK ZÂT

III. GRACE HOME TÂN

1. Central KTP	Rs 56,050/-
2. Sêrchhîp Bial Kohhran Hmeichhia	Rs 10,000/-

3. ENF, Synod Hospital Unit, Durtlâng Khum 2	
4. KTP, Khawlailung Bial	Rs 3,000/-
5. Ruantlâng Bial Kohhran Hmeichhia	Rs 5,000/-
6. Chaltlâng Bial Kohhran Hmeichhia	Mattress 6
7. Siphir Vêngthar Bial Kohhran Hmeichhia	Rs 5,000/-
8. Tlungvêl Vêngthar Bial Kohhran Hmeichhia	Rs 5,000/-
9. Zemabâwk Bial Kohhran Hmeichhia	Rs 10,000/-
10. Zemabâwk Kohhran Hmeichhia	Rs 10,000/-

IV. THIL DANG PETE

1. Zotlâng Kohhran Pavalai Pâwl, Aizâwl	Compound hnim samfai hnatlâng
2. Pûkzing Bial Kohhran Hmeichhia	Hmunphiah 50
3. Laki Kohhran Hmeichhia, Tuipang Bial	Hmunphiah thahnem tak
4. KTP, Siphir Bial	Chapel thutthleng siam nân Rs 15,000/-
5. Ramrikawn Kohhran Hmeichhia	Nursing School khum siam nân Rs 7,000/-
6. Khatla Bial Kohhran Hmeichhia	Physiotherapy Unit tân Godrej Steel Chair (three Seater) 2
7. Bûkpui Bial Kohhran Hmeichhia	Hmunphiah thahnem tak
8. KTP, Luangmual Branch, Aizâwl	Compound hnim samfai hnatlâng
9. R. Vânlalhruaia Râltê, Communication, Saron Veng	Naupang Ward tân Bath Tub 2

V. PAWISA DAWN ZAWNG ZAWNG -

1) Rs 2,17,060/-
2) Rs 1,04,050/-
3) Rs 22,000/-
Total Rs 3,43,110/-

Khawngaihna leh duhsaknaa thilpêk min petute zawng zawng hnênah Lalpa Isua Krista hmingin lăwmthu kan sawi tak meuh meuh a ni. Heng in thilpêk kan dawnte hian dam lo awm man harsate thlamuang takin a awmtîr a, Hospital mamawh tam tak min phuhrûksak baw a ni.

Sd/-
(REV. R. RAMDINMAWIA)
Chaplain, Synod Hospital, Durtlâng.

PATHIAN THU ZIR DUH TÂN

Presbyterian Bible School, Mission Vêng, Aizâwl-ah C.Th (Certificate in Theology) zir tûr lâk a ni leh dawn a, dil duh chuan hêng hi hriat tûr a ni e:

1. Admission Form Office-ah Rs. 10/- a lei tûr a ni a, August 21, 2018 (Thawhlehi) tlai dâr 3:00 thleng PBS Office-ah theh luh theih a ni. Diltu chu Class VII pass/Middle School exam pass, kum 16 aia naupang lo, Kohhran dân chhûnga awm a ni tûr a ni.
2. August 28, 2018 (Thawhlehi) zing dâr 10:00-ah interview neih tûr a ni a, September 3, 2018 (Thawhțanni)-ah Class țan a ni ang.
3. Zir hun chhûng thla li i.e. September-December, 2018 a ni a. Hrechiang duh tân Phone No. 2317343 / 2325082 / 9436198231-ah zawh fiah theih a ni. Hostel a awm lo.

Sd/- Rev. Lalneihvûra
Principal
Presbyterian Bible School

SYNOD MULTIPURPOSE TRAINING CENTRE HRIATTIRNA

Kohhran Upa Lay Leaders Training-a la koh lohte hming leh Postal Address te Presbytery Secretary-ten Programme Director, SMTC, Mission Vêngthlang-ah hriattîr tûr a ni e.

Sd/- Rev. Vânsâwma
Prog. Director, SMTC

SÂWMNA

* Lungpho Pastor Bial chuan kum 50-na, Golden Jubilee August 2-5, 2018 hian an lâwm dâwn a. He hun hmang tûr hian Lungpho Pastor Bial chhûnga lo awm tawh zawng zawngte leh Bial chhûng Kohhran mi hmun hrang hranga awm mēkte an sâwmin an hriattîr a ni.

* Kohima Presbyterian Kohhran Hmeichhe Pâwl din a nih aţanga kum 50-na (Golden Jubilee) chu ni 22-23 September, 2018 chhûng hian lawm tum a ni a. Kohima Kohhrana lo lawi tawh zawng zawngte he Jubilee lawmna hun hmanpui tûr hian an sâwm a. A hranpaa sâwmna leh hriattîrna sem a nih loh avângin hei hi sâwmnaa ngai tûrin an ngên a ni.

RAM PUM HUAP BEIHPUI THAWH HNIHNA

Synod Revival Committee-in *'Ram chu LALPA ta a ni'* tih thupui hmanga ram pum huap beihpui a kalpui chu a thawh hnihna kalpui leh mēk a ni. Bial 72-ah Synod Revival Speaker ţang lai 69 leh Revival Speaker lo ni tawh thîn pathum tîrh chhuah an ni. Ram pum huap beihpui hi kumin (2018) MLA General Election lo awm tûr denchhana kalpui a ni ber a, beihpui kaihhruaina lehkhabu tē, 'RAM CHU LALPA TA A NI' tih chu nikum lam khân tihchhuah a lo ni tawh a, beihpui kal tûrte hian thupui hi an zir ho hmasa a ni. Pathian duh zâwna ram rorêtu thlan an niha ram rorêna pawh kalpui a nih theih nâna mipui rilru buatsaihna lam a chuanga tam ber. Mi ţa leh ţa lo pawh thliar hlei thei lova party mi candidate apiang vote tumna rilru paih deuh deuh tûra tûn hma aţanga Synod Social Front-in Political Campaign a lo buatsaih thîn nēn pawh a tum chu thuhmunah a ngaih theih awm e.

SYNOD LETTER BOX DAH THU

'Synod hian Bâwngkâwnah Letter Box dah rawh se' tih rawtna chu SEC chuan ţa tiin Bâwngkâwna Synod Bookroom behchhana dah ni se tiin a rêl (Vide SEC 269:80) chu bawhzuiin Bâwngkâwna Synod Bookroom pâwn bangah Letter Box chu dah a ni ta. Synod Office kal remchâng lote tân Letter Box hi hman ţangkai theih a ni ta e.

Letter Box-ah hian Synod Office-a thleng tûr lehkhâ chauh dah/thlâk tûr a ni a, Department dang leh hmun danga kal tûr chi chu dah loh tûr a ni. Letter Box-a lehkhate hi Nilaini leh Zirtâwpni apiangin Synod Office aţangin lâk thîn a ni ang.



SYNOD HOSPITAL-A THISEN PÊK CHUNGCHÂNG

*Dr. B. Lalnunthari
i/c Blood Bank, Synod Hospital*

Kristian Thalai Pâwl member-te leh Kohhran mi, tlâwmngaia damlote tâna thisen pe thîn zawng zawngte chungah Synod Hospital chuan lâwmthu a sawi tak meuh a ni.

Synod Hospital hian Blood Bank hi March 17, 1997 aţang khân a nei ţan a. Kristian Thalai Pâwl (KTP) member-te leh Kohhran mi inpe tak tak zârah vawiin thlengin thisen pek tûr haihchham lutuk lovin kan la awm theih phah a ni. Kum khat chhûng hian thisen unit 3000-3500 vêl kan dawng tlângpui thîn a ni.

August 12, 2014 aţang khân kan Synod hmalâknain thisen thliar hranna khâwl (Blood Component Separator) kan lo hmang thei ta a, kan damloten an mamawh ang tak thisen an lo dawng thei ta a ni. Tin, private hospital danga damlo thisen mamawhte pawhin minrawn ţâwmpui thîn bawh. Kan thisen thliar hran hi thisen a sen lai tak leh a vâ chi hnihah kan thliar hrang a, mi pakhatin a pêk hi chi thumak kan lo thliar hrang thîn a ni.

Hetiang thisen thliar hranna kan lo hman tâkah chuan kan thisen lâk rêng rêng hi kan lâk aţanga dârkâr hnih chhûngin khâwl hmanga sâwngbâwl char char a ngai thîn a, chûngte avâng chuan Aizâwl khawpui chhûngah Blood Donation Camp kan neih chauhin kan thisen lâkte hi kan thliar hrang hman thîn a ni. Tin, hetia thisen thliar hranna kan hman theih aţang hian a hmaa kan lo hman thîn thisen thliar hran loh (whole blood) hmanna tûr hi a tlem ta hle a ni.

Central KTP hian khawpui chhûnga Pastor Bial hrang hrang KTP member-te thisen pêk hun tûr calendar a ti chhuak thîn a, chumi zûlzui chuan Inrinni leh sawrkâr chawlh ni te hi Blood Donation Camp neih nî atâna hauh leh dah a ni kumtluan ta deuh a; chûngte avâng leh Aizâwl pâwn lama kan lâkte hi thliar hran theih a nih loh avângin khawpui pâwn lamah hian kan chhuak thei ta meuh lo va, in mi hriatthiamna kan ngên ngâl a ni.

Khawpui pâwn lama KTP member-te nēna Blood Donation Camp neia rawng kan bâwl ho thîn hi nuam kan ti hle mai a; chutih rual erawh chuan mi thisen kan lâk kha damloten an hman tûrin ţangkai leh hlâwk thei ang bera hun rei lo te chhûnga thliar hran a tûl thîn si avângin dârkâr eng emaw zât thanga a hmuna kal chilh hi a remchân lohna lai a awm ta deuh a. Aizâwl khawpui pâwn lam aţanga thisen pe duha minrawn dâwr thîntute zawng zawng pawh in duh ang kan tihlawhtling vek thei lo a nih pawhin in mi hriatthiamna kan ngên che u a ni.

A tâwp berah chuan, he tihdam rawngbâwl hna thawh nâna ţangkai tak mai a a thlâwna thisen pêk hi uar zêl ila, a thawktute pawhin damlote tâna chhenfâkawma kan thawh zêl theih nân in mi ţawngtaipuna kan mamawhin kan ngên ngâl bawh a ni e.

P.C. WALES INKHÂWMPUI LIAN HMANPUI

Presbyterian Church of India (PCI) Moderator Rev. Lalramliana Pachuau leh PCI, Mizoram Synod Moderator Rev. F. Lalrinnunga te chu sâwm an nih angin Presbyterian Church of Wales Inkhâwmpui Lian hmanpuiin Wrexham-ah July 7, 2018 khân an kal. Inkhâwmpui zawh July 12, 2018-ah Zosâp missionary, Samuel Davies fanu Pi Zosiami (Mair Edwards), ni 1.7.2018-a thi vuina, Wrexham-ah tho hian PCI leh Mizoram Synod aiawhin an tel ngâl bawh.

LEHKHABU PAWIMAWH CHHUAK THAR

Synod Service Rules 2018 a chhuak thar a, Synod hnuiaia thawktu zawng zawngin mamawh lamnaah lam theih a ni.

Synod Bu 2017 (Financial Report) a chhuak thar bawh a, Kohhran tinin Synod Office - Mamawh Lamnaah lâk theih a ni. Synod Bu 2017 chhuak hmasa (Minute & Reports chuanna) la lo kohhran eng emaw zât an la awm bawh. A dawng tûrten a hma thei anga la thuai thuai turin Office lamin a ngên a ni.

I Chronicles Hrilhfiahna, Rev. Lalsangliana ziak leh **2 Chronicles Hrilhfiahna**, Rev. C. Lalsangliana ziak, Synod Literature & Publication Board-in Gospel Centenary Edition a chhuah tawhte enawna chhuah/chhut nawn, kumin Puitling Sunday School zirlai puitu ţa chhuah thar a ni bawh a, Synod Bookroom hrang hrangah lei theih a ni.